



「期待」煞變「傷害」

從破病了後，就真少距起去三樓尾，頂懸種的盆栽無人照顧，逐樣看著攏欲死欲死。看毋是勢，緊提水殼仔來沃水。當咧沃花的時陣，雄雄聽著有人咧擲電鈴。水殼仔擲咧，趕緊從落來看是啥物人來相揣？

送批的大聲喝講愛頓印仔，講是對日本寄來的掛號批。批梟仔印甲誠古錐，批的內容誠趣味。我那看那笑，煞袂記得樓頂尾的花，猶閣喙焦等欲淋水。雄雄想著，趕緊閣走倒轉去三樓尾。

距起去到三樓頂，跛步才踏出戶橫，隨閣勾倒轉來。無意中看著伊頭仔犁犁，佇水殼內底淋水，淋甲 *suh-suh* 叫。驚共伊拍生驚，我就覘踎窗仔後偷看。看伊 *ki-ki-kùh-kùh*，踎花坵邊仔歪箍輾。尾仔頭擰懸懸，展翅飛對天頂去。我擰頭看伊飛去，愈飛愈遠，最後干焦賸一點烏烏，杳杳仔佇天頂消失去。

水沃好了後，我的心肝頭一直咧想講，伊毋知是離家出走？抑是參加比賽，半路歇落來揣水淋的過客？明仔載伊敢會閣再來？

伊好親像知影我對伊的關懷，自彼擺了後，伊逐工攏來。有當時仔閣會招一大陣朋友鬥陣來。淋水淋了，規陣蹣花樣跳來跳去、*tshi-tshi-tsháh-tsháh* 耍袂煞。耍忝矣，就蹣花樣跛歇睏，一直到日頭欲落山，才相招飛轉去。

我驚水無夠個淋，專工攢一个喙較闊、較深的水缸，閣佇花樣跛掖一寡米。三樓頂煞變做伊食點心、歇喘的所在。毋管好歹天，攏會 *ku-lu、ku-lu* 來吼兩聲仔。看伊蹣花樣跛躑來躑去，彼種自由、歡喜、快活的款，煞變做我破病了後，上向望的一種期待。

這一工，我閣一擺距起去三樓尾頂，規个三樓尾恬甯甯，恬甲予人起雞母皮。我感覺誠怪奇，踏倚去水缸共看覓，看著伊規身軀澹漣漣、有砢砢，定著是淋水的時陣，無細膩跋落水缸予水駐死。

共伊撈起來，輕輕掙伊烏咿烏咿、金燦燦的毛。伊的喙角猶閣咬一粒米，死甲遮爾悽慘，予我看甲誠毋甘，目屎強強欲滴落來。

從伊予水駐死了後，三樓尾頂閣再恢復早前彼款的恬靜，我心肝頭彼種期待嘛消失去矣。過頭期待煞變做傷害，我無心的錯誤，到這馬猶閣囤佇心肝內，幾若冬嘛無法度排解。

作者：王朝源

☆詞彙學習☆

【水殼仔】*tsuí-khok-á*：裝水的容器、杓子。

【沃水】*ak-tsuí*：澆水。

【擲電鈴】*tshih tiān-lîng*：又唸作 *jih tiān-lîng*。按電鈴。

【從】*tsông*：慌亂奔忙。

【戶橫】*hōo-tîng*：門檻。門下所設的橫木。

【勾】*kiu*：畏縮而退卻不前。

【拍生驚】*phah-tshenn-kiann/phah-tshinn-kiann*：驚嚇。

【有砢砢】*tîng-khok-khok*：形容堅硬、強硬。

【駐】駐：卡住、塞住。